



鹿裘石室集卷第二十一

宣城梅鼎祚禹金著

詩

五言絕句

相逢行

與君相結交
底事借錢刀
結交借錢刀
那用交賢豪

其二

交結失勦兒
辟炊沙作糜沙
亦安可食交亦安



可持

其三

千金構寶刀夜冷陰精泣帶郎左臂前風吹海水立

子夜四時歌

春歌

陽春二三月飛花網蛛絲持此纏繇意囑郎惜
豔姿

其二

歡自與儂嬉傷人那得見春風宰地來開帳吹
歡面

夏歌

小女入郎懷展轉枕郎臂但如抱清水那得三
伏氣

其二

荷花照水然荷葉自田田望歡歡不見雙魚劇
可憐

秋歌

屋梁石室集卷二十一
梧桐滴露清砧杵中夜發舉頭認雙星低頭看
羅襪

其二

秋高八九月空堂織流黃斷絲不成匹拋梭出
望郎

冬歌

送郎騎馬別枯楊折作鞭儂願枯楊綠馬繫大
門前

其二

儂惡地上霜見儂去時跡歡言去無跡東南出
杲日

高陽樂人歌

翩何馬上兒結束千黃金豔殺當壚女雙投玳
瑁簪

白鼻騮

君乘紫騮馬我騎白鼻騮美酒通顏色相逢在
狹斜

碧玉歌

唐荅石室集卷二十一
碧玉小家女逢君有輝光媚不在珠玉相憐自
斷腸

估客樂

人言估客樂估客信自樂大艚千幅帆三江恣
遊博

其二

珂戩大江來是儂所歡否所歡寄得書開緘復
停手

其三

大船如走馬長篙如列檝願為檣上烏逐郎千
里行

其四

一舸載三千歡自揚州還且無相攬抱與儂蒲
鍛環

莫愁樂

洋洋工西曲嫋嫋會人情相值自相樂不負莫
愁名

襄陽蹋銅蹄

底用宜城酒何必習家池濁醪幕地飲箇是高
陽兒

前溪歌

儂住臨前溪溪水碧淥色郎帆如織張招搖不
可得

其二

賢德儂敢攀感郎自相顧酒味奪沙糖前溪且
莫渡

野田行

陰風吹白楊饑鳶啄枯骨夜深燐火明老狐拜
新月

湘娥怨

洞庭木葉下鱗鱗秋始波九疑何限色落日怨
湘娥

明妃怨

自倚能傾國翻成遠嫁夷主恩應不淺猶得作
閼氏

婕妤好怨

世事有興歇秋風不可辭
昭陽羅綺月曾見奉
恩時

銅爵怨

一旦雄圖盡漳流日夜東
獨餘歌舞妾臺上泣
西風

閨意

夜夜望刀頭朝朝生石闕
道環空有期銜碑不
得發

偶題

冥鵠亦何慕神龍安可羈
白眼看衆人折腰耻
小兒

其二

賢者日以賢賤者日以賤
有酒且盡歡千秋情
自見

夜詠

罷酒意不適出戶羣星稀
脈脈花間立流螢飛
上衣

其二

鹿裘石室集 卷之十一 六
四壁寂無語一燈閒自張題扇懷明月揮絃悵
履霜

飛雨樓酌吳鍊師

縣厓晴雨飛橫空涼吹發方池湛虛明恍惚對
秋月

其二

颯然寒襲人醉君一壺酒欲拾驪淵珠空翠不
盈手

自白嶽歸

予從白嶽來袖有三珠樹高齋迷白雲疑入天
門路

田間早行

白露濡我衣行人道上稀明星在高樹滿田螢
火飛

潘理官賦閒園雜詠

清華軒

平池澹夕流天風梳木葉據石作龍吟翛然超
萬劫

隱翠亭

秀色隱纖雲
疎陰散明月
焚香坐晏如
秋思清人骨

芙蓉沂

采采芙蓉花
秋光何寂寂
艇子插平沙
西風吹落日

柳浪橋

斜日翳橋西
飛絮橫波上
照影綠差差
春風吹柳浪

懷仙臺

仙尉余前身
千年隱吳市
聞君臺上笙
騎雀渡秋水

問月臺

問月月不言
揮杯杯在手
玉杵有玄霜
奉君千歲壽

玉鏡池

雲散金波麗
天開玉鏡光
蛾眉携晚照
纖月鬪新粧

六觀亭

暫覓塵中靜因叅相外觀本來何處見孤月海天寒

薔薇架

風簾香遞露曉障錦藏春密刺斜勾袂東風覺媚人

載酒亭

人世一虛舟莫疑亭是舫晴川載酒還落日波光蕩

通靈道中

桃花不出溪桃源在何許西風吹客衣馬首逐人語

有期

碧雲看暮合美人期夜來春風先報喜催得燭花開

失期

美人期不來燭花亦自落明月墜空帷清霜散寒柝

唐荊石室集卷二十一
姑孰傷楊崇業

每携姑孰水遙薦李青蓮
一勺更何處楊家吊
大玄

金陵姚鴻臚市隱園

昔者隱金門今者隱吳市
我來秋影亭消搖誦
秋水

青蓮字尋無著上人不遇

擬結白蓮社來尋青蓮
字塔影落繩牀鐘聲挂
祇樹

江寧道宿

身在長安道却夢長安
月歸思凌清秋砧杵一
時發

酒病已復飲大醉戲作

暫醒逃歎計爛醉定生涯
已命從劉錡能輕絕
杜家

柏枧道中

連翩馬上來東風吹人面
雨洗千芙蓉歷歷雲
中見

鹿巖石室集卷二十一
十一
別田子執廣文

短劔千里游寒光飛白練
臨歧脫贈君照人心
一片

自新安徂黃山道中作

宛水照心明歛江傳至清
兩鄉風土似誰信客

中行

李白劉長卿詩

其二

漸覺曾霄近全疑絕棧危
瀑聲長在耳嵐氣直
侵眉

其三

間道縣厓轉孤村曲
澗陰磨豸時有跡
雞犬乍聞音

其四

黃山成獨往白雲相與期
問知餘藥在何用
裏糧隨

寄金陵主人

未有千金報終慙一飯恩
尚留雄劍在且莫笑
王孫

愁

月色不可掃客愁不可道西風江上吹閉門長
秋草

寫懷

憶與人相別垂楊碧乍含無心看飛絮江北又
江南

其二

腸自聲聲斷孤燈聽雨喧不勞湘上雁何必峽
中猿

野田行感所見而作

陰風遠寒郭白楊泣蕭索不知泉下人乃稱南
面樂

拏舟就吳氏

裸體刺餘皇期子于城北高齋何所為招要敬
亭色

張侍御同宿白洋池亭

風自北牕來人在東池宿落月隱平林殘雨滴
修竹

一尊

一尊那作驩孤燭誰相向微風掌上來吹酒寒
生浪

田間雜書

舊與農相狎茲來轉近情滔滔者天下沮溺耦
而耕

其二

向無冠可挂亦無簪可投有髮復不理溪上風
颭颭

其三

西園種果樹未得一果嘗隣兒語食性不必施
高墻

其四

陸隱商山翁水逸玄真子茹芝可療饑為漁以
樂死

其五

白石祭可數清溪澹不流希聞堯禪事可以飲
吾牛

其六

阿翁書萬卷阿郎不能讀何以忍朝饑但供蠹
魚腹

其七

公孫老牧豕衛豎少驅羊將相亦偶爾不得誇
身強

其八

五月日日雨六月日日晴天公有翻覆世事任
縱橫

吳立之席上醉別

立馬不能去念子良悠哉微雨蕩殘醉山公倒
載回

送客

把手意徬徨紫駟嘶道傍丈夫輕萬里結伴且
遊梁

其二

黃河水十丈一鴈天南飛游子不顧反閨中泪
濕衣

郭五自城中至

君自城中來為問城中事
看山寂不言絺衣濕
空翠

入路西湖

澹日湖開鏡
遙天樹列簪
浮家易來往
行樂在江南

其二

荇花何粲粲
蓮葉何田田
湖氣連秋色
網罟作暮煙

京邸季豹別登舟復來

行行不能別
復作禁城留
翻笑山陰客
輕回興盡舟

獻花巖宿小星槎

一宿獻花巖
宛然見天女
樹杪掛銀河
欲着星槎去

祖堂讀鄒子何侍郎詩

地荒僧住少
堂在草生長
拾得前人語
登臨憶侍郎

秣陵別吳孝父陸華甫俞公臨方于魯方
元素謝少廉汪士能潘景升

勞勞亭下路相送折枯楊不問東流水應知別
意長

江上懷棲霞寺余累約長欽大理游雨阻
家恭人書至遂渡江

遙禮千巖佛空瞻萬壘霞踟躕東渡棧不是戀
京華

出柏觀留示箕台

把酒欲別君繫馬堦前樹妬殺山中雲只在山
中住

江陵樂

上水如拾級下水如引繩峩珂搖巨舩大半指
江陵

其二

漢水幾千里千帆風怒乘借問乘風客大半是
江陵

太白樓讀宗子相詩

千古太白樓大江流日夕北來可與語一片寒陵石

牛渚月夜待史使君留皖城未至

知有前期在扁舟尚未還莫將牛渚月不及皖公山

采石別朱少府

一醉遂分手挂帆江日斜空携寶劍去常媿魯朱家

為汪巨源題居士貞畫

流水在屋下白雲在屋上流水無時窮白雲有時長

蕪江雜詠

水清舟在空天寒人不渡曉夜北風吹飛雪大於鷺

其二

探囊無酒錢臨江有酒肆新詩欲代酤主人不識字

其三

前船絲肉陳後船簫管作估客從何方但言估客樂

其四

舟中何所有孤劔倚牀立不聞風雨聲但見蛟龍泣

言周玉如有序

其人故倡家所從不終迺自髡以明志余本其名傷之焉

爾以玉見髡和以璞見刖燕石客珍藏有足復

有髮

對亭庵覽王仲房為余題壁

題詩秋寺裏秋雨長青苔佛日當空轉客星何處來

君典索梓余草辭之

雖抱荆山久虛言吐白虹自知非世寶不敢示良工

弔賈春孃墓

誰是多情者秋風叩墓門易銷雖豔骨不散自

香魂

何在二首

落日馳暉疾臨流逝水長但令聞玉笛何在不
山陽

其二

座少前來客門多近積逋但令當末路何在不
蕭朱

橫塘曲贈王玉華

儂家橫塘側朝朝下橫塘上有雙菡萏下有雙

死央

一解

歡來亞字城儂渡橫塘水兩影併一心終當為
情死

二解

閭門諸少年齊唱橫塘曲儂但取新聲譜出持
歡讀

三解

清絲間流管是郎石湖遊平頭雙槳子儂自蕩
郎舟

四解

存杏辭為姚武岡師作

杏華何纂纂其實何纍纍春者辛如蓼昔者甘

如飴

一解

昔種庭下土一母將一雛雛復哺其子遠樹三

匝呼

二解

淮橘與枳化東李代桃僵何如茲樹杏枝葉日

相當

三解

漂搖易風雨棠稅不得驕爾杏慎勿翦高門以

待招

四解

為秦符題徐翩翩畫枕

含情為吮墨着意綴蘭篔白雲秋夢遠片石枕

瀟湘

河北道中雜書

新城古督亢圖以歿荆卿漏月何琴女乃傷壯

士心

其二

景州距南劉平沙三十里殘雪忽偷春柳絮因

風起

其三

我經東阿縣因憶東阿王燃豆何太急飛蓬何

太楊

其四

齊亦有高唐楚亦有高唐楚雲既渺渺齊風非
洋洋

其五

昔昔雪如霜朝朝霜若雪流影寒照人那能鬢
不白

其六

歸亦無所樂自關遊子情及渡黃河去萋萋春

草生

為郭舜舉題景六首

楊灣漾碧

初楊拂新波一碧極千頃時作蕩舟行參差上
春影

古樹團陰

古樹春布葉夏則息其陰三宿亦自可本來無
戀心

語溪漁舟

唐荊石室集 卷二十一
語兒復禦兒吳越寄一嘅漁舟無古今但聞歌
款乃

塢涇暮雪

塢港暮蒼然雪光炯欲曙搖搖酒旗風知向誰
家去

新橋夜月

臨流竹千个繚以虹百尺古月抱古琴冰壺濯
人魄

大木晴陰

飛蓋何團團其名曰端正喬木識故家炎山望
清蔭

題縱江印心閣

皇威躬蛟處佛力制龍降高閣傳心印縱陽月
一江

六言絕句

新安道中

流水曲時聞碓桃花着處成村側嶺偶披樵徑
迴岩或隱柴門

題畫

半水半煙着柳半風半雨催花半沒半浮漁艇
半藏半見山家

六月九日紀水

新豐不識雞犬中林可集鳧鷗永晝頑雲遮暝
炎天積水成秋

其二

晏子居原湫隘海若觀亦淼茫老農久嗔黑蜩
小兒猶舞商羊

其三

愁吾水維且緩謂彼河伯不仁蛟龍兮方遠騁
魚鼈乎其斯民

閣夜

露蕊半含彩筆月輪圓照瑤杯南枝烏栖深樹
東風人醉高臺

贈周來儀

終歲青油短棹平生白柄長鑿孽取幽蘭七澤
採將靈草千巖

苦酒

影蛇何自稱病仰鳩猶堪覓生惟有金陵惡釀
爭先玉帳佳兵

鹿裘石室集卷第二十二

宣城梅鼎祚禹金著

詩

七言絕句

春辭二首

別後冰絃不忍彈小樓花雨怯春寒歸鴻目斷
香雲碧愁倚東風十二闌

其二

海棠殘月照人低枕上關山路欲迷生怕啼鶯

驚曉夢垂楊不種畫闌西

劉明府席上戲贈

五柳先生家不貧
牀頭漉酒自留賓
只今座有如花者
猶是河陽縣裏春

江上別張文介

君歸浙水我歸吳
江上青山夢裏孤
後夜相思腸斷處
月明霜白聽猿呼

送客

江雨瀟瀟江水長
柳煙漠漠柳絲黃
眼看春色

愁無那又送孤帆別故鄉

對酒

一飲須拚盡十千
杖頭羞殺百文錢
怪它高價長門賦
不換臨邛種秫田

其二

却笑才高李謫仙
浮雲空自怨當年
江湖到處堪君醉
何必長安市上眠

客過

人道柴桑處士村
酒徒相遇即開門
寧教不入

蓮花社何得長拋竹葉樽

讀荊卿傳

易水蕭蕭白日寒
獸携匕首報燕丹
便令環柱秦王走
壯氣長虹世併看

春雨

輕煙細雨望中迷
江草汀花併作泥
門掩鶯聲春過半
風吹寒色到牕西

夜雨

孤懷夢裏三更雨
雙鬢愁來一日秋
却笑寒燈

解相識照人疎影到西樓

月夜

笑躡雙鬟踏月歌
寒生青影奈春何
月中那得人如許
却悔當年喚素娥

金陵曉出玄武堤

毵毵楊柳鳳城西
半醉垂鞭信馬蹄
十里曉山開翡翠
一湖春水浸玻璃

盛仲交大城山看梅讀嶺南黎祕書詩

數椽高卧白雲間
我為梅花一叩關
醉後羅浮

三載夢春來又落大城山

靜海寺禮繡佛永樂中得自西洋

傳聞法藏此中開龍象原從渡海回亦有長齋
蘇晉在案頭合掌禮如來

聽查八十彈琵琶

張六當年最擅場曾經供奉幸
先皇白頭弟

子惟君在一曲琵琶淚幾行

天界寺訪斌公值其卧病

禪林長日少經過翠竹蒼苔積雨多本意攢眉

尋慧遠却因示疾問維摩

少年

二八妖姬醉裏呼十千新釀夜重沽少年百事
不稱意且學高陽稱酒徒

漫興

狂來經月不梳頭日日尊前醉不休無事便須
高枕卧倘因春色一登樓

早秋得吳叅知明卿洛中信

玉節親承下九關因君夜夜夢嵩山洛陽城外

秋風起萬里黃河一鴈還

寄上唐丈人大梁五首時方為治河使

鴻鴈秋高木葉黃登樓何必憶吾鄉
宦游笑殺江南客白下山多似洛陽

其二

龍門千尺練光縣見說黃河水接天
夜半客星纏紫氣知君槎泛斗牛邊

其三

五都鄴下獨稱雄二八如花滿魏宮
銅雀臺荒

歌舞散西陵松柏正秋風

其四

二室花開照使旌浮丘僊客舊知名
拍肩笑控緱山鶴明月青天把玉笙

其五

夷門立馬問前朝虛左高風久寂寥
眼底蒼茫秋不斷千年俠氣未全消

寄崔伯溫塞上

曲中楊柳又回青無數梅花落敬亭
遙憶孤筇

吹出塞寒沙明月倍愁聽

其二

白草黃雲眺暮秋蕭然誰共賦登樓故人已解
綈袍贈莫向風塵歎敝裘

沈君典新內金陵女伐朝二首

沈郎腰瘦不禁秋更費黃金覓好逑仙史風流
千載見吹簫人在鳳皇樓

其二

遊賞堪將細馬馱春風嬌欲曳輕羅雙谿不是

秦淮水莫唱當年玉樹歌

道中口占

路入青山眼倍明落花深處亂啼鶯無端愛看
雙溪水此地翻從客裏行

其二

叱犢催耕雨後田隔林茆屋散炊烟水聲泱泱
農歌起正是江南四月天

題畫

遠寺鐘聲度水西千林垂午綠陰迷閒亭日永

真如歲坐客無言鳥自啼

其二

萬峰迴翠片流清雲色高寒倚杖生乍聽天風
梳木葉小橋斜日起秋聲

太微樓夜聽松風

長松虛閣頰蒼煙萬頃濤聲一枕縣片片龍鱗
吹欲立忽驅寒雨徧諸天

白嶽簡陳明府德基

掌上芙蓉散夕曛偶騎白鹿出人羣春寒未有

金光草一片飛霞持贈君

其二

金銀宮闕自天都風馭泠泠不可呼怪底幻身
輕一羽原從仙令借雙鳧

王少叅筵聞箏

蛾眉新月寫初長白玉雙童出佐觴每拍曲終
曾未誤十三金鴈並成行

春暮還家園即事

近水家園自一天主人今日始言旋眼前不識

春多少柳葉殮風乍咽蟬

其三

牡丹飛盡剩餘香纔是看花第一場
惡殺耳邊歸去好輕將三字妬春陽

子建再過潘園以書至兼貽天池積雪圖
西風匹馬醉陶家背郭丹楓一徑斜
乘興重來尋酒伴眼看春色逗梅花

其二

歲暮傳書一解顏茫茫江海更誰閒
依稀夢裏

逢君處半在天池積雪間

寄何叔度萬雲

江上初愁玉笛聞千峰吹落萬重雲
揚州十月梅花發斜日憑闌轉憶君

逢范先生是余兒時塾師

相逢一醉菊花天幾度春風侍講筵
我髮漸長君漸短挑燈閒說十年前

夜醉

虛堂長嘯劃然秋萬感燈前一醉休
自是俠心

銷不得摩挲霞眼看刀頭

登閣

殘醉危闌眺夕天
敬亭蒼翠倍堪憐
看山雙眼
今無恙較是閒心不似前

其二

冪冪烟林渺渺波
江風吹酒發狂歌
孤城歛照
鳴蟬罷轉覺憑高意緒多

俠少行

十年破產買吳鉤
三尺寒泉掌上流
恩怨並酬

心即了笑他辛苦覓封侯

其二

美人挾瑟上高樓
一擲千金不掉頭
北斗西垂
喧滿座紫駟嘶處綠楊愁

獸坐

坐來魚鳥自相親
一片涼颼起白蘋
此事子雲
真不曉浪誇奇字引閒人

對酒

霞谿如鏡漾明霞
溪外青山抱屋斜
領畧閒情

杯在手石闌開
徧紫薇花

其二

蓮落故衣時
結子燕穿虛
幙日教雛鄒
卽今眼底
能無醉
漸覺秋光到
井梧

涇縣水西遊望

千疊峰嵐映水斜
望中春滿萬人家
風光依舊
江南好
煙雨猶開紅白花

夏日

已借深巖逃赤日
儘拚高枕却黃塵
覆牕幽竹

是知己隔水鳴蟬
何惱人

書都官公集後

千古高名瞻北斗
一時大雅振西崑
廬陵空起
斯人歎
夔蜀猶知此道尊

飲王仲房

與君同飲夜厭厭
解醉名香手自拈
坐久忽疑
霜是月素光
浮動水晶簾

送仲房

穠色蒼然木葉丹
留君沽酒暫為歡
尊前何限

青山路落日蕭蕭一騎寒

送王檄遊金陵

石頭城外駐仙槎
朱雀橋邊問酒家
高價十千君莫惜
一年春色在桃花

其二

縱橫俠氣任家貧
結客還餘一擲身
三尺提攜都市裏
相逢誰是有心人

望疊嶂樓奉懷故鍾使君

美人為政有光輝
暇日高樓坐翠微
望裏孤雲

猶未散何能不憶謝玄暉

同諸從弟登潘家山

風淒木落杪穉天
羣從相看盡惠連
但說登山高酒興
探囊已辦十千錢

醉後書壁

勘破浮生惟一笑
巧馴狂性是孤吟
百年三萬六千日
何日金杯好不深

其二

眼前鄉曲難為
千載何堪問姓名
有酒但須

邀客醉從他天氣自陰晴

送岑生還郎川因訊子會

落日虛堂聽爾歌尊前雲色媚纖羅相逢未必
皆同調纔唱陽關恨轉多

夏日懷龍郡丞

青山無恙故人違何意芳尊手自揮記得龍谿
君別處淡煙斜日一帆飛

其二

敬亭蒼翠自堪憐况是玄暉在郡年一片孤雲

余暫領待君同吊李青蓮

金陵有懷朱比部出守重慶

莫愁湖上晚潮生玄武湖邊秋月明東下巴江
流萬里雙魚不到石頭城

遊山門諸洞

山門

策杖天門誅蕩開千巖萬壑共縈迴依然流水
桃花在莫問漁郎幾度來

紫雲洞

紫氣吹成萬疊雲
洞門深鎖晝氤氳
吾將倒挽天河水
恐浣僊家素練裙

碧雲洞

洞天空闊亂雲流
一碧寒光炯不收
夜半仙人騎白鶴
霜毛點破萬山秋

朝陽洞

天雞啼罷曉星涼
夢醒千年白玉牀
金碧晶熒光一線
海波銜日上扶桑

夕陽洞

洞前有仙人枰

不問朝陽與夕陽
洞中日月總茫茫
試從此地看枰石
人世能消幾局長

連漪洞

穿雲裂石碧連漪
濺瀑飛流玉乳垂
中有臥龍鞭不起
人間霖雨望多時

明心洞

半巖遺洞久陰森
殘偈新教綠蘚侵
不是九年曾面壁
那從此地得明心

早春過袁汝鳴故居

風吹書帶碧初長
谿水泠泠一草堂
鄰笛居然聞不得
何人懷舊似山陽

聞山東楊將軍物故

大樹蕭蕭起大風
將星初落海門東
獨留雙劍猶含血
夜夜牀頭吐白虹

送王博士歸楚

官冷誰憐鄭廣文
拂衣歸作白鷗羣
江城三月桃花水
一片春帆挂楚雲

贈別

遠山雙黛寫新蛾
銀燭金尊碧玉歌
愁逐東風渡江去
楊花無定奈春何

太平逢王檄

長軀七尺曼胡纓
裘馬翩翩俠少行
日落山城無酒市
逢君空有故園情

過崇果寺看石鏡呈余廷佩先輩許道甫

叔姪

青山幾曲白雲環
路入鐘聲杳靄間
已道風塵顛顚久
可勞石鏡問朱顏

登龍巖看瀑布

萬峰迴合隱丹梯一片春雲望忽迷日日天風
吹不盡玉龍飛挂洞門西

自白嶽趨石橋巖

人家稍似武陵谿不着桃花也自迷翠壁丹崖
三十里鞭龍又過石橋西

登石橋巖寄劉丞子敦

乍疑鞭石引層空絕壁千尋一徑通道是僊人
君不信看余今日跨飛虹

休寧五懷詩

詹孝廉東園

在輦下

憐君失路尚栖栖薊北浮雲望欲迷便是到門
無一字向來凡鳥不堪題

曹主事仲宣

在儀部

握手燕山未有期僊郎蘭省玉為姿孤城野寺
鐘聲曉正是君聞長樂時

余時寓建初寺

任別駕山甫

在滇郡

五年曾附一書還萬里春光動百蠻縱憶故人

空有夢風吹明月點蒼山

程文學巢父 在金陵

鳳皇臺傷 帝城東落日浮雲感慨同君去又

逢芳草暮六朝興廢酒杯中

程公子巨源 在廬次

聞君淚眼欲縣河無限傷心廢蓼莪盡說素車

千里至不知誰解倚門歌

新城月夜憶汪仲嘉謝少廉

城頭北斗漸闌千萬戶鍾聲客夢殘今夜月明

天似水美人只隔一河看

涇縣幙溪感憶王使君維楨是使君昔追

送處

幙溪不讓鏡湖春狂客何如賀季真却恨酒船

回棹處飛花還送昔年人

早秋得蹇使君晉陽書

晉陽書至轉淒淒一夜愁心火共西鴻鴈只今

來此地有詩難向故人題

舟汎聞笛

長歌醜酒放中流十里蒹葭白露愁
夜半何人吹玉笛月明秋色在扁舟

登蠓磯

江門一柱倚中天濺沫飛流百丈懸
知有龍宮秋不闕時時雷雨起尊前

其二

估客帆檣萬里來江寒秋老夕陽開
一譚吳蜀頭堪白風送潮聲獨上臺

簡劉七乞水僊花

蕊仙乘月步江濱羅襪盈盈惹白雲
玉珮一雙君拾得可分楚客入騷文

寄懷朱比部

對酒酣歌倒着冠中宵星斗共憑闌
三山只隔雙溪水不盡寒雲醉裏看

其二

別來事事轉堪憐風葉霜花媚晚天
不分白雲西署裏長飛仙客馬蹄前

其三

唐李石室集卷之二十三
十一
僊才吏隱大江濱
譚劍飛觴坐夕曛
却羨黃金能結客
因逢白雪倍思君

塞上曲

烽火連宵屬漢宮
材官十萬出雲中
蓮花直吐龍淵劍
柳葉能穿鵲血弓

其二

秋風嫋嫋度秦關
一夜胡笳鬢欲斑
又聽中軍傳秣馬
明朝直擣賀蘭山

其三

白登臺畔月如霜
萬里征人望故鄉
羌笛不知何處起
關山此夜曲徧長

其四

飲馬長城水不流
北風吹雪照吳鉤
年年自向沙場老
多少將軍未拜侯

宮辭

天桃穠李鬪年華
繡戶瑤牕貼絳紗
三十六宮春不管
御溝流水送飛花

其二

鹿裘石室集 卷二十一 十一
蓮漏迢迢夜未央宮車明日幸平陽一從主第
更衣後粉黛三千總斷腸

閨怨

繡幕雙飛海燕斜櫻桃當戶又開花玉門關外
春應好蕩子經年不憶家

其二

遠書初寄塞鴻聞百戰猶隨霍冠軍不信寸腸
曾萬轉請看錦字織回文

羽林郎

千金散盡少年場走馬呼鷹氣莫當白晝殺人
都市裏脫身新拜羽林郎

小游僊

瑤池日進紫霞觴八駿如龍御穆王黃竹白雲
歌未歇又看青鳥報東方

青樓曲

總道春風在狹邪青樓百尺映千花一花一醉
須千日那得狂夫更憶家

大堤曲

天半高樓漢水濱
大堤女兒解留人
斟來美酒沙糖味
醉殺江城花月春

採桑曲

秦家小女字羅敷
春日提筐在路隅
妾意自愁桑易老
使君五馬莫踟躇

採蓮曲

千花的的葉田田
簫鼓凌波唱採蓮
莫問吳姬誰得似
西施新上越來船

楊柳枝

楊柳青門二月春
年年攀折送行人
也知芍藥原堪贈
誰遣長條獨苦辛

橫江辭

八月濤聲殷地來
廣陵東望海門開
儂家夫婿乘潮去
不及潮能日一回

橫塘曲

嬾童膚玉勝龍陽
倩女乘春各豔粧
第一江南行樂處
畫船簫鼓出橫塘

豔歌行

唐詩石室集 卷二十三
十五胡姬細馬馱春風宛轉曳輕羅傾囊允得
新豐酒一曲千金聽豔歌

碧玉歌

纖枝颭雨復翹煙一識春愁劇可憐却數秦箏
絃十四初逢碧玉破瓜年

楊叛兒

博山爐煖水沈香楊叛兒歌妾斷腸試看白門
疎柳盡歸烏風急不成行

章臺柳

雙蛾罷掃鏡生塵裊裊章臺柳色新京兆不來
春又老但隨葉葉學含顰

風雨經袁汝鳴墓

一坏荒土郭門東酒魄詩魂細雨中縱有楚辭
招不得蕭蕭愁殺白楊風

板橋道中

謝眺出新林浦向板橋
詩旅思倦搖搖在金陵

細雨濃愁斷送春板橋新綠長溪蘋搖搖似出
新林浦滿地楊花亂撲人

送王徵入吳從軍

三千組練照三吳身在行間膽氣麤萬里長風
吹海色萬莫教麋鹿上姑蘇

寄山東兵使趙公趙由御史出

海岱乘秋繡斧行霜飛七十二齊城何人不識
青驄使天子還思白馬生

其二

憲府新開節制雄河山十二漢時功帳前鼓吹
親裁曲東海泱泱大國風

其三

千隊兜鍪錢襖襠曾聞技繫出東方如君文武
堪為憲趙將虛傳馬服良

遊仙曲壽彭宜人

雙珮垂垂亞六銖雲翹瑟瑟綴珊瑚月輪中夜
擎滄海人在仙家碧玉壺

春莫

五晴十雨妬春陽何處看春不斷腸日日閉門
高枕卧風吹階草共人長

子建止子會賦閒園走詩相近余以病不

得赴寄報四詩期過敬亭

青楓江上夢魂疎
把手無緣但寄書
聞說觀濤曾有賦
故人多病似相如

其二

蒼然秋色白雲孤
一片愁心落五湖
今夜月明天更遠
知君把酒憶狂夫

其三

名園曲塢自藏春
况是潘郎玉作人
縱有後期堪十日
尊前誰復彩毫新

其四

牀頭酒熟待君來
籬下花繁取次開
千載敬亭看不厭
風流端少謫仙才

題美人圖

半簾秋色夜何其
拈得瑤簫踏月吹
無意秦臺閒覓伴
莫將消息報人知

送人

江雨蕭蕭江水長
柳烟漠漠柳絲黃
眼看春色今如許
何忍孤帆別故鄉

贈何郎小婦蕊珠

蕊珠仙子上清家
豔色熒熒映曉霞
雙跨紫鸞吹玉管
春光醉殺碧桃花

公臨別之夜留酒家

鑪頭酒色豔葡萄
臨發孤舟懶自操
慣有胡姬能喚客
玉樓春滿月輪高

送東平劉生之薊門謁戚都督

胡天一望盡黃雲
鼙鼓漁陽動地聞
家在東平稱俠少
佩刀長揖大將軍

逢故陸金吾家樂人

逢人問是霍家奴
白首春風唱鷓鴣
故末路也知行不得
可能先勸執金吾

雨中與台坐台有詩興秋徧壯之句

知君詩興秋徧壯
我自年來轉怯秋
就取眼前拈舊句
滿天風雨下西樓

雨後同吳立之登樓

高樓徙倚白雲秋
歷歷空林暮雨收
不盡尊前今古意
孤城寒壓一江流

寄荅諸省元大圭時家大人守會稽延為
二先兄師

忽驚秋色度江來轉憶悲哉作賦才
夜夜月明千里望流光先到越王臺

其二

莫怪青雲願久違由來白雪和音稀
君看越市樵歌客五十才能侍漢闈

其三

經年猶未報雙魚自笑迂疎但索居
欲上會稽

探禹穴天風吹動碧霞裾

其四

曾奉籃輿浙水湄銷魂雙鴈影差池
即今懷舊惟君在更有何人為問奇

大人歸賞家園牡丹余留郡中不得侍會
別有集

遙知追賞洛中春自恨猶羈陌上塵
料得倚闌長笑處却輸行酒艷粧人

其二

唐荊石室集 卷二十一
細雨芳林一水斜瓊枝片片落朝霞即今不悔
看春晚為有尊前解語花

遲沈君典

垂柳江邊蕩午風花飛無賴雪漫空何須寒夜
方乘興亦有青山似剡中

過鴻臚叔見款

乘興閒過溪上村逢君釣罷立柴門牽衣笑問
來何處且喚烹魚薦酒尊

其二

曲徑春深薜荔侵席前鶯語換芳林從教花片
風吹盡吾醉移牀卧綠陰

即席重別張大來

敬亭花發憶分羣此日梅開又送君一片離懷
無處着倚樓還望水西雲

戲同義父贈徐優得陵字

午夜虛堂醉一燈美人如玉酒如澗樽前何惜
纏頭費公子風流自五陵

時父叔席上走筆

乍喧天氣試生衣二月溪南花亂飛濁酒共君
聊一笑隔林好鳥喚斜暉

疊嶂樓懷鍾使君

疊嶂春風共酒尊名高元自起龍門十年不作
登樓賦落日空銷別後魂

懷崔伯大

鴻鴈相將北地還人今南望隔千山天涯流落
崔亭伯白髮春風夢舞斑

孫姬

盈盈十五嫁王昌舊說孫家墮馬妝未慣翠蛾
閒惹恨遠山雙黛畫教長

戲贈

月照明珠掌上紅簫聲偷出鳳皇宮向來定是
荆王侶曾住巫山若箇峰

其二

綵雲飛度玉闌干一曲陽春夜不寒但得卿來
吾便醉高陽元作酒徒看

鹿裘石室集卷第二十三

宣城梅鼎祚禹金著

詩

七言絕句

送右轄馮公赴楚八首

有序

若楚服幅員最廣方城漢水寔式靈之屬者
稱 明天子湯沐邑而左顧在楚矣四明馮
公初繇臬使者治兵六郡徙鎮三吳海波不
揚苻萑用戢越歲蓋遷楚右方伯云夫吳楚

皆東南地 國家之維是倚毗不啻天府公
楚則楚重公吳則吳重三輔陪京豐鎬在望
迺先吳後楚爾人言玉衡執而七政齊北斗
酌而四時運此其爲烈巨細較然卽以公重
楚寧久勞公居外哉鼎祚竊稽故實楚亦頗
繁敬衍八章陳諸祖道彼其人善絲綉之思
而開詞賦之祖不佞何能與聞焉

褰帷爭識大馮君到處甘棠沃若雲六郡向遵
司馬法三吳仍督水犀軍

其二

虎竹麟符下建章使君千騎領東方胡床秋滿
南樓月又詔元規上武昌

其三

漢江爲酒日堪攜江草江花接大隄更向習池
歸倒載山公笑殺醉如泥

其四

蘭茝雜佩滿湘潭屈宋衙官當晚叅千樹紫薇
三萬軸共傳書癖杜征南

其五

峴首風流片石知
居人墮淚憶當時
只今重見羊開府
載道嶙峋是口碑

其六

鸚鵡洲邊芳草生
樓高黃鶴俯江聲
向知幕下容狂士
一勺椒漿酌禰衡

其七

楚天霜落水微波
颯颯青楓暮雨多
却望洞庭秋色徧
不知何處弔湘娥

其八

獵火中宵映渚宮
蘭臺盡日敞雄風
大夫作賦真能事
寡和由來在郢中

秋日過蔣村修社

修竹依然一徑開
西風門巷掩蒼苔
鄰翁曳杖前相勞
又入雞豚社裏來

何四游金陵近有信之揚州

但說隨潮過石頭
又聞騎鶴上揚州
珠簾十里銀燈照
妬殺簫聲出玉樓

題王仲房小像

老作王潭處士身空將阿堵說傳神雄心一片
憑誰見好手由他自畫麟

其二

五嶽隨身一劍遙翛然黃鶴不須招它年便逐
浮丘去遺像人間識子喬

寄朱秉器按察大梁因薦吳汝州廷承汜

水令子登

雙鯉巴江一札傳西風落木又經年逢人馬首

中原入憶爾嵩山畫戟前

其二

十年開府未爲遲回首青谿結社時玉樹歌聲
都散盡桓家一笛向君吹

其三

一片飛雲入大梁黃河北望正茫茫從知幕府
多辭客日向平臺醉幾場

其四

虛左當年意氣真信陵千載尚如新抱關小吏

勞君問亦有夷門任俠人

答弟台

故園松菊暗驚秋繞戶寒泉日夜流別後憶君
溪上路白雲芳草共悠悠

保豐臺秋望

寒江湛湛日流東一雁西飛下暮空獨向保豐
臺上望斷腸秋色在丹楓

感舊寄管孝廉彥懷

同住城東第一峰經行長倚殿門松十年往事

君休問愁聽開元寺裏鐘

送汪生還姑蔑

蒼苔濁酒破愁顏十月清霜匹馬還世事奕棋
君自見怪來常憶爛柯山

天逸閣送吳生兄弟南還

登山臨水送將歸細雨清尊對夕暉莫向高樓
悲過雁天南今作一行飛

程天錫過君典郊居邀余和贈

片帆湖上度孤雲日落蕭條乍見君自愛東田

秋色好非關名借沈休文

雨悶

桃花李花空自芳日日閉門人斷腸今歲玄冥
偏得令不知何地着東皇

寄遠

踈地垂楊隱畫樓三年不得醉筇篻愁人自分
愁如海枉殺盧姬喚莫愁

送程畫史入梁謁西亭王孫

梁園今自孝王開辭客鄒枚託乘陪修竹檀欒

夾池水憑君雙管乞將來

送馬愚還白下

苦憶平生馬少游相逢尊酒別高樓明朝欸段
愁南首一路青山到石頭

送閔山人游金山

送爾初爲汗漫游白雲無際大江流鏡中一點
金山小蜃氣吹成十二樓

樂游苑示主人

晴湖湛湛草斑斑新酒勞君破客顏六代帝城

秋色裏樂遊苑上望鍾山

京城南尋陳子野明府不值

別來縣榻定生塵更見當門五柳新
自笑身非期會客難從投轄問陳遵

東麓亭醉望謝公墩

冶城秋色滿宮門東麓亭前醉一尊
江左只今名士少那能不望謝公墩

畚劉公恒比部送酒

愁來買醉問新豐久客長安似夢中
但得一尊

銷夜雨不將秋色弔江楓

雨花臺呈劉陳二大夫

說法高僧有舊臺秋空不見雨花來
與君指點前朝事日落寒江進酒杯

和王十二桃葉渡感舊

尚留名姓少年場桃葉桃根總斷腸
也憶渡時那用檝風流不是舊王郎

鷲峰寺訪王山人

昆侖山人不出山也將雙足踏人間
煙霞一片

心猶在燈影經聲自閉關

送張五落第歸涇川

長安客舍送君歸來往棲棲一布衣如此頭顱
成底事五湖何處問漁磯

蕪湖界寄龍使君

大峰如月小如星水似銀河色更青烏鵲飛殘
人不渡一槎秋色曉冥冥

九日雨

陶家舊徑近全荒尚有黃花對客黃眼底滿城

風雨急依稀今日是重陽

書門

平生結客不知貧少年場中多負人留得黃金
付紀叟壚頭醉看敬亭春

寒夜憶季豹山中

思君獨苦更思歸老盡山中薜荔衣入夜城烏
棲不定一庭寒葉向人飛

柏枧山家見茶花

鑿石緣源半作家隔林煙火夕陽斜天寒客到

柴門少種得茶開滿路花

送黃兆聖如金陵寄張子明諸子

白雲一片送君行落日蕭條去住情寄語金陵
諸子弟莫愁今在石頭城

懷僊曲同君典作

蔥青玉樹發琪花十二虹樓切太霞東望扶桑
西弱水仙人時駕五雲車

其二

阿母春風醉碧桃宴開平圃白雲高空中雙瑄

調靈鳳海上三山戴巨鼇

其三

仙歌誰與唱金巾綠酒瓊蘇億萬春跨鶴中峰
周太子駮鸞南嶽魏夫人

其四

霞珮星冠降碧壇真文十賚給仙官熒熒日抱
黃金島眇眇天垂白玉棺

古怨

明月長懸玉鏡臺丁香花下待郎來當時贈得

同心結縱有春風翦不開

其二

小女深閨見客羞蛾眉宛轉縮春愁生來不識
鴛鴦鳥繡出鴛鴦却竝頭

送萬明府之於潛

風流仙令玉爲顏暫爾携琴到世間一片煙雲
心尚在分符猶得傍名山

其二

城頭山色徧飛霞不數河陽滿縣花酒熟北堂

春日永笑他勾漏覓丹砂

其三

君才百里未須論但得佳山卽

主恩豈必兒

童騎竹馬千巖明月待開尊

其四

一望高峰秋色中青天倒插碧芙蓉臨風欲躡
三千丈願借飛鳧當白龍

飲張五大來侑以口號

別來遙寄白雲書枉殺琴谿藥滓魚到得此中

猶不飲卻令嵇阮笑迂疎

其二

空堂雨霽石榴新
漉酒時憑江上巾
眼底紛紛君自見
更誰能和郢中人

張五別歸約十日爲來期賦二章貽之

逢人不解記人名
偶喚張郎四座驚
一語便成千載事
妬他鸚鵡亦傳聲

其二

十日還期看藥欄
何如昔昔臥琅玕
到來已盡

菖蒲酒應剩南山色可餐

雨夕憶張五

雲黯千山雨四垂
憶君曾共雨中卮
只今隱几題詩夜
不似虛堂握醕時

王大以其集屬選披讀有作

賦就登樓舊識名
逢君倒屣媿同聲
自憐雅有中郎思
二十年才讀論衡

村居日給簡闕戲作自解

縱有青蚨乏酒沽
浪從花裏聽提壺
獨醒不是

元來意誤殺人稱楚大夫

其二

已知遠市減盤飧乍可空山習菜根
明志自能甘澹薄平生不傍五侯門

詠古四章訓姜明府

縣金不惜構多材市骨應圖列駿來
隗始雖慚千里足至今人自說燕臺

其二

絳灌邠堪年少尊虛勞流涕扣天闈
長沙莫續

招魂賦前席須知亦主恩

其三

薄命從教屬勝人畫工偶自誤傳真
漢家舊有和戎策不是君王棄妾身

其四

四海清狂禰正平十年賁刺漫空名
不緣文舉能青眼碌碌誰知鼓吏情

歸來三章戲示內子

歸來空復敝貂裘三度秋風汗漫游
說向山妻

吾舌在不愁無地覓封侯

其二

歸來莫問下機人
落魄乾坤一病身
海內弟兄俱俠少
只今誰不傍風塵

其三

歸來不負鹿門期
坐弄烟霞對酒卮
秋色淮南知幾許
好看藜桂發新枝

秋日沈君典二三兄弟月夕興懷雲謠寄况益有味哉昔人之言遙知兄弟登高處徧插茱萸少一人各占近體馳音空谷余憮然其命援筆次焉

沈君典遙字

郎川秋色儘招搖
剡水風流豈寂寥
伏枕懷人魂欲斷
千巖明月夢中遙

潘子會知字

白首同歸昔有期
青山不負掌中卮
眼前誰會陽春調
花樹河陽是舊知

汪子建兄字

君懷雙璧月同明高價堪償十五城敢向桓文
誇代霸詞場今日讓稱兄

俞信夫登字

然諾余今媿五陵孤懷千里托壺水聞君亦有
悲秋賦落日高臺醉裏登

子會高字

故人何意問綈袍病色將無避濁醪邂逅自堪
占太史德星遙傍少微高

程天錫菜字

此會真憐海內無遙看秋影蕩平湖同時兄弟
知多少獨爾尊前念插茱

君典萸字

虛憶當年一酒徒壚頭爾輩自狂呼預愁風雨
妨重九早向龍山試紫萸

子建人字

紀叟猶能釀老春敬亭佳氣望中新君來好入
東村社破戒還携漉酒人

聞董貳卿幼海先生歸松江寄呈此篇

引裾名動南荒戍曳履材高北斗班忽買青山
臨海上遙瞻紫氣滿雲間

其二

主恩龍臥風塵遠歲晚鴻冥日月閒出處直將
人世玩清秋不獨憶鱸還

莫春潭上送汪逸人

愁聞兩岫踏歌聲柳色青青照莫春千尺桃花
潭水綠轉教今日送汪倫

憶山中寄季豹

只自呼尊只自歌繞城花發奈君何也知春夢
全無定終是青山入夢多

招史使君

茗椀薰爐事事宜與君長日靜譚詩只緣花發
雕闌畔添得東鄰酒一卮

牛渚北望寄龍使君聽徙燕中

南登牛渚望燕臺不盡長江萬里來如此風波
公莫渡筮篋吹徹楚歌哀

其二

久從海上作波臣又向燕中結酒人
易水蕭蕭寒色甚難將鄒律變陽春

題所佩劍

寒光片片吐龍鱗尺鐵何曾暫離身
莫逐延津風雨化明朝還作報恩人

劉公謨江館代贈

綠波吹蕩碧雲寒歌舞留人百寶闌
一寸莫從長短較爲君新製鷓鴣冠

口號寄山中諸子

季豹閉關讀書余市中困冗

聞君雅已閉關成萬卷牀頭送此生
却笑席門甘自老虛勞長者大逢迎

孺斯聞絕愛幸小徐生其兄弟竝爲清
倡而兄勝

翩翩闌入少年場對酒看花總斷腸
君自娛歌三婦豔風情原說老徐娘

子綦有新侍而病目

伏枕蕭條倍可憐還將白眼答青天
笑君空有

文君侍霧裏看花似老年

泰符約結夏文春如故年余未往

科頭箕踞共長松曾聽東林寺裏鐘
入夏看雲還憶弟不知文春似何峰

秋早過玉上人

高齋一榻意蕭然坐對寒燈繡佛前
試共推窓看秋色敬亭楓葉散初烟

其二

題詩每過朗公家手汲新泉自煮茶
送客出門

天欲曙半空飛雨濕袈裟

樓夜

寒色篝燈思欲迷玉虬清漏度樓西
篆煙自裊人孤坐月滿高林謝豹啼

飲次作

興來樽盡笑家貧忽發牀頭剩老春
便是濁醪堪一醉柴桑何用漉紗巾

其二

願傾尊酒化爲澗意氣長教壓五陵
夜半醉提

雙劍舞虛堂風急暗秋燈

夜懷

宛陵城下草萋萋宛陵城上烏
夜啼愁人展轉不成寐萬戶砧高片月低

柏枧寺訪佛肩上人相遇

寂寂秋堂僧不逢白雲留客倚長松
凌空飛錫知何處日暮風吹萬壑鐘

覽黃使君登九華詩奉贈

江左名山九子峰青天秀出九芙蓉
一題謝眺

驚人句朶朶還看紫氣封

九日同吳無文登敬亭望劉明府別業有

懷

携君九日上高臺無數黃花照眼開
却望陶家秋色近東籬誰遣白衣來

送馮開之自宣城還西湖別業

送君一舸自東還湖上秋風獨掩關
直置離情銷不得孤雲愁殺敬亭山

其二

焚魚學製芰荷衣却笑金門大隱非怪道君身
有仙骨陵陽借得白龍歸

其三

緇衣共載泛湖船此地來叅黃蘗禪七百餘年
公案在還看玉井出金蓮

太史來宣城
與一僧俱

其四

一賦凌雲舊有名文園消渴望金莖卽今誰諫
長楊獵多恐君王問長卿

有感

年年看盡故山春未是東西南北身却笑乘輶
如貴客掛經牛角更何人

答汪子建郎川

二月春風陌上時送君攀柳柳成絲只今咫尺
無由送縱有長條好贈誰

其二

剡川風景半猶存雪湧寒波自一村近日子猷
清興減扁舟不及戴家門

謝友可遊九華至龍井見寄將東訪敬亭

九華仙窟覓仙蹤
龍井還堪問伏龍
相望諸峰開菡萏
題詩初日上芙蓉

其二

敬亭雲鳥欲逢迎
一櫂澄江似鏡平
況是青山家好在
更教人喚謝宣城

春日得程子虛吳門書

清秋醉別鳳皇臺
花落花開更幾回
又見春風君作客
闔閭城下一書來

寄姜戶曹謫高唐州

十年纔領度支章
又遣東齊作逐鄉
世態雨雲原不定
莫將幽夢誤高唐

君典吳姬病戲問之

歌簧乍冷鏡生塵
雙黛含顰態轉新
一出吳宮春欲老
西施原是捧心人

寄劉達可比部謫六安

楚天一望數行啼
團扇秋風憶舊題
今日廬江稱小吏
哀情還似仲卿妻

哭陳子野明府

鹿裘石室集卷二十三
秋老空江一雁回因君蕭瑟賦悲哉可憐驚座
名猶在那見金陵尺牘來

其二

生綃一幅寫新篁風雨西牕夜夜涼今日片雲
秋色遠還將雙淚哭瀟湘

其三

城南結社白蓮新石子岡頭幾度春待得遠公
開酒禁攢眉無復社中人

金陵寄友

桃葉渡頭花正妍莫愁湖上月初圓卽今花月
交輝處春色從君樂府傳

贈楊三桂林八首

含嬌流目送君前吹徹笙篴欲曙天家住青谿
第三曲阿郎今得小姑憐

其二

雕房羽帳綴流蘇春色沉沉曉易晡道是海棠
剛睡足一痕紅線上珊瑚

其三

華清初浴試新妝玉鏡臺前月似霜天與翠蛾
雙宛轉不須人道畫眉長

其四

醉來美態更橫陳雙頰紅潮百轉新向說天桃
君不信可知花下解迷人

其五

錦裘貂帽紫蒙茸馬上琵琶出漢宮纔唱明妃
清怨曲一時紅粉泣東風

其六

花滿秦淮結伴行衆中私語喚卿卿市頭載得
羊車去擲果當時最有情

其七

攜手長橋醉蹋歌月殘秋冷濕凌波不知烏鵲
曾來否昨夜分明見渡河

其八

風前玉樹正葱青一曲傳來是後庭却笑望仙
空自望那知閣上有張星

其九

十樣新牋錦不如題來字字照瓊琚他年天祿
堪攜去乞作當朝女校書

其十

青驄油壁兩相尋薄倖青樓恨到今何惜爲歡
顛顚盡西陵松柏結同心

送懋上人遊九華

一藤一鉢一架裝行腳多年未有涯遙指東林
堪結社雲中九朶是蓮花

敬亭舟中別諸子

高孝徵

十月寒江欲暮時勞君攀柳柳無枝市中儘有
酣歌地只是尊前少漸離

張仲率

雙谿能白敬亭青一曲驪歌不可聽後夜蒼茫
寒色裏還從天上覓張星

吳長輿

南北風煙一水分孤帆遙拂石頭雲倘教騎鶴
揚州去折得瓊花寄與君

徐翁仍

裘馬翩翩上帝京五陵豪俠舊知名徐家七首
如相贈不遣恩讎負此生

弟子馬

愁人夾岍是丹楓落日蕭蕭起北風已道片心
隨去鷁還將雙目送歸鴻

贈揚州張嬌

玉人曾聽廣陵簫明月常懸念四橋莫問阿嬌
誰得似縱教金屋貯難消

過楊姬長卿齋中

博山爐煖水沉香匡坐齋頭白日長禪觀不妨
天女侍他生應在世尊傍

楊三折梅見寄

雙槩何嫌問渡遲渡頭鴈月下流澌翻教桃葉
常相接不道梅花有所思

贈西寧侯小史馮佐兼致黃白仲

白晳兒郎好冶遊青衣月下弄箜篌秦淮春在
西寧府却笑盧家有莫愁

其二

嫣然別種自情多
綠情垂髻奈爾何
曾向黃公鑪畔見
可教容易隔山河

逢馬四瑤姬

春風曾向武陵遊
千樹桃花十二樓
今日洞門尋曲水
仙人依舊在高頭

楊三館逢楊一璆姬

依然穠艷照人長
誰信蛾眉一夜霜
自是楊家多姊妹
可徒春色在沉香

逢楊一談舊事

碧海茫茫隱玉樓
空勞魂夢作仙遊
向來私語長生殿
真似明河隔女牛

江行見羣鴈

連翩飛鴈破蒼煙
蕭瑟江南九月天
今歲稻粱難共飽
憑傳尺素上林前

蛾眉亭感李白事

紅顏原與妬相期
千載清平事轉悲
歸去夜郎銷國色
孤亭愁說對蛾眉

風逆

月生新暈水生波歲晏天風發棹歌儘着來帆
張似蓋半生南北逆途多

次黃池

布帆閒殺晝行遲慚媿南風作意吹縱是思家
明日到半蓬煙雨入黃池

鹿裘石室集卷第二十二

終

